

論也

科曰同學法衆縱復才德實勝前人名年在後猶應敬讓若前人推之因讓勿飾若彼加我我摺不報儻來崇我我摺不敢當時不獲已事勢所須或宜師我我又三讓後雖在位心猶敬前迹無敬儀比常例又相知者道念志同就之為友此心友也雖同學道志操非堅此泛交也其面交瞻其顏色欲結交迹而無交心其例甚衆大略有五一者門戶由來相似二者仕宦階級相關三者位卑而有勢四者驥賤而有財五者年色相類皆為俗交學道心交擇人揀志同者貴不驕棄於下賤賤不諂求於高貴忘年忘勢唯志道同違者七刑論也

科曰前雖結交後名官有別或為師長或為師友或為臣下皆解交執當時之禮若上命不解皆須讓下為文在上不得呼下解在下不呼上結義上命之也

造壇緣第三

二十四生圖曰元始天尊延賓清堂黃金為

壇白銀薦地本際經云太元國王請經得力乃國中造大精舍建大寶壇又云絕和國王好樂造壇一月三壇周而後始又云林先生為壇有女侍於美色笑調先生後為醜陋又云爾時地下踊出七寶靈壇高地一百餘丈上下九級周匝八面級有九洽各有金格玉磬八十一枚晝夜六時自然而鳴八十一者同聲而發又云靜玄弟子請問天尊因何壇治從國踊出天尊答曰初高上帝王說本相真經時有空王造斯壇治淪隱不見今說本相壇治開而踊出五符序云帝嘗乃祭天帝於杜阿之壇也

碑闕第四

本相經云范則子順子得道但見太清玉碑闕上有二白鶴碑石書云往以共學道經宗三十六部由心不專志難會契也

要修科儀戒律鈔卷之十三

要修科儀戒律鈔卷之十四

三洞道士朱法滿編

飲酒緣

經云斷酒即行調和氣性太平經云真人問曰天下作酒以相飲市道元據凡人飲酒洽醉狂詠便作或即闕死或則相傷賊害或緣此奸淫或緣茲高墮被酒之害不可勝記念四海之內有幾何市一日之間消五穀數億萬斗斛復緣此致害連及縣官或使子孫呼嗟上感動皇天禍亂陰陽使四時五行之氣乖反如何故作狂藥以相飲食可斷之否神人曰善哉飲食人命也吾言或有可從或不可從但使有德之君教勅言從今以往敢有無故飲酒一斗者笞二十二斗杖六十三斗杖九十一斛杖三百以此為數廣令天下使賢人君子知法畏辱必不敢為其中愚人有犯即罰作酒之家亦同飲者真人曰或千里之客或家有老弱或祠祀神靈如何神人曰若千里君子知國有禁小小無犯不得聚集家有老疾藥酒可通

千真科曰出家之人不得飲酒或託天寒詐稱腹痛飲後色變或聞亂尊卑或應供赴齋或施行章醮或遊道路或應對公私非唯自失禮儀抑亦穢辱道衆是滅道法無生弘讚然應人範請本以清潔為先出公入私皆用端嚴為首有如此例皆犯律論靈寶經云生而飲酒者死則連汲溟波水灌沃四瀆中或曰道法之中聽許飲酒靈寶經云置酒浮雲觀高飲玉清臺此何頓隔答曰何見之謬太清經云化金玉為三十六水以金為水則為金漿赤玉為水則為瓊漿白玉為水則為玉漿或云玉液定志經云五者不醉常思淨行何有許法五嶽圖序云

斷穀服藥緣

丹蠟神方斷穀可千歲不食自肥不瘦能力作負重方真丹一斤芒硝半兩茯苓一升皆搗合之以白蠟二斤中合煎之九上九下可丸便盡丸之如梧桐子服十九解一月不食也
老君守中赤丸法用白蜜一斤真丹一斤一

方三兩白蠟一斤先細切蠟以銅器煮酒令沸乃投於蠟安酒中蠟消下器著冷水中蠟凝後下如此三上三下蠟凝出之棄酒乃獨以蠟著銅器中火上使沸九沸九下後下之內白蜜後上火一沸下之內真丹攪令相得欲變便急丸之如彈丸欲斷穀服之初服一日服一九二日服二九三日服三九後從一九始凡九日服十八丸為一劑便守中四十年不飢顏色氣力如故可自擔遠行渴者飲少冷水亦飲少酒勿復有所食令人不畏毒但不能延年長生耳辟穀輕身氣力不減山行不極也若不能吞大丸亦可分作小丸計之合藥齋七日王相建滿定日合勿令小兒女人雞犬見之後若欲還食穀當煮葵子一升作薄粥飲之藥即下乃先稍稍食糜勿使頓飽也此沈君所用以與牛馬服皆不復食草而肥健如故秘驗一方直洋蠟三上三下乃內蜜一沸內丹撓之冷使成守中諸鎮丸法後茶乾黃精木槿實人參各一兩搗篩以白蜜五合白蠟二兩合煎和藥更搗千杵服

如小兒奉一九然後可服大小四鎮服九後又應長將爾件栢葉先茯苓丸為佳小鎮丸法丹沙半斤茯苓半斤禹餘糧半斤麥門冬一升白蜜三兩凡五物丹沙餘糧茯苓下稀和以蜜搗三萬杵麥門冬去心三兩作四九手摩令有光以滿日平旦東向服一九却十日服一九却十日復服一九是為三十日服四九止服此藥得度世者有三十餘人合藥時用王相滿日當齋戒勿令小兒婦人見之不得食葷菜生菜及至死喪生產家此方長史書
守中徑易法取大豆必生者三升手授令光明甲體暖先美食竟乃頓吞之可解五十日百日渴則飲水勿餘食欲去之服熱粥二升豆即下一云每向日再拜一服一升於口中展轉誦六甲通乃咽之三日明日乃分一升為三過小兒則半之又赤豆肉吞二升至三升亦支一歲又取大豆黃末三升一頓餐之亦可十日五日不食後欲食當服葵葉灰方寸七即下服猪膏及酪蘇亦善

又法先嚼蠟大如博棊極令柔乃內研氏肥
糞并合嚼之即皆消而咽之入腹正氣除病
斷穀又但食一方寸蠟辟一日

又法取檀榆皮白者各一斤酒一斗漬之出
乾復漬盡酒止一服二兩十日行三千里

又法桑椹黑者暴乾搗之水服三合日三則
不飢

又法三月三日若十三日二十三日取白茅
根淨洗細切水服亦可暴末併備之日服五
六止勿大飽長服令人美色不老伏鬼神

又法薤白五斤稻米一斗豉一斗鹽半合以
水三斗煮令熟爛初飽食後稍稍進不飢除
寒熱延年

服松根法取東行松根剝白皮細剉暴燥搗
篩飽食之可絕穀渴則飲水

又法但取栢葉暴燥為散蜜丸服之則不飢
亦可水服亦可酒服以白酒和散暴乾又搗
服益佳

服松葉法四時隨王方面林近上去地丈餘
者細切如粟水調若薄粥汁服二三合日三

亦可搗碎暴乾更末服之亦可搗木酒浸暴
乾更搗篩以酒飲及水調無在子服久服並
令人輕身延年體香少眠身生綠毛還白絕
穀不飢服之當使有恒栢葉亦然

服氣斷穀法先閉口咽內氣勿吸外氣也一
日三百六十咽以上為但欲多耳能至千尤
快以漸斷穀十日後自不用食穀斷三日或
稍稍飢或小便赤黃無苦可取兩三乾棗日
中九枚酒日中可一二升初小極後轉好也

食十二時氣法常從夜半九九咽雞鳴八八
平旦七七日出六六食時五五禺中四四日
中復從九九起皆當合口大咽之今氣入腹
每咽一時足輒漱數津液吞之數過各轉向
其辰之方面益佳十四五日中當頭眩瘦極
過此漸佳

服符水斷穀書此六甲陰陽符皆各
隨其日支干書內方中
也可兼引內函中至此
日取以祝水而服之也

服此陰陽符平旦東向左手持符右手持水
器祝曰真人某甲好樂真道服食中和之氣
甲子太玄玉女承翼給侍某用行厨所在去

所當得無令飢渴軍無大小人無多少皆當
得飽畢以符著口中水送之唯在人多耳若
欲斷他人穀千人百人皆東向列拜拜自稱
名各為書符與之共飲一器水耳

甲子向太玄玉女承翼

甲戌向黃素玉女飛廉

甲申向太素玉女瓊石

甲午向降宮玉女雲齡

甲辰向拜精玉女靈素

甲寅向青嬰玉女惠精

此六向玉女名當其呼之勿誤也

玉君絕穀符滿日丹書紙燒以神水吐向
再拜服之執水向月建三祝曰金木水火
土五星之氣六甲之精三天倉清氣常
盈黃文赤子守中無傾畢報三叩齒三啄

杯乃以服符并飲水一升右並出太
清下卷

老君服水斷穀法

不問清且但是須飲即啖以一杯盛水向水
祝曰

金木水火土五星之氣六甲之精真人天倉

清氣常盛黃文赤子守中無傾三祝三叩齒
飲之令人不知飢渴渴後之極有神驗近往
往有人得力此方是養生經卷後錄出祝與
前少異更未得別本勘知之道基曰祝六畜
不食法祝曰萬物皆含水如生水入腹中萬
神皆驚有脉之物皆可絕無脉之物不可絕
六畜皆牽向王也

治祝錄

登真隱訣諸行事存想祝願並在其中今略
出一兩要急耳每當經危險之路鬼廟之間
意中諸有疑難之虞心將有微忌物所經後
者乃當先反舌內向及舌向上柱喉中臨祝
乃中之咽唾三過畢以左手第二第三指捻
兩鼻孔下人中本之鼻中隔孔之內際也三
十六過即手息按勿舉指計數也此急按中
陰款以一息為一過之久鼻中隔孔之際名
曰山源一名鬼井一名神池一名邪根一名
魂臺也此後祝中有此五名故先出其案微
夫人云山源是鼻下人中之本側在鼻下小
入谷中也針之亦治卒死掩鼻因叩齒七七

通畢又進手心以掩鼻畢未去手仍叩齒
竟仍進左手掌以掩鼻口指端至髮際并覆
明堂之上也於是臨目睛目內存明堂中三
君以鈴鏡赤先煖而擲之又存泥丸赤子帝
君執錫大洞具經以威攝之也

乃微祝曰朱鳥陵天神威內張山源四鎮鬼
井逃亡神池吐氣邪根伏藏魂臺四明瓊房
玲瓏玉莫輓我坐鎮明堂手揮紫霞頭建晨
光執誅洞經三十九章中有辟邪神虎截嶽
斬罔狂獸奔牛銜刀吞鎗揚山攫天神雀毒
龍六領吐火啖鬼之王電猶雷父擊星流橫
東磔駭灼逆風橫行天禽羅陳皆在我傍吐
火萬丈以除不祥羣精啓道封落山鄉千神
百靈併首叩顙澤尉捧燈為我燒香所在所
經萬靈奉迎十九該畢又叩齒三通乃開目
除去左手於是感激靈根天獸來衛千精震
伏莫于我氣此中並是神獸靈司之名號故
可以震却精邪

右出大洞真經高上內章邊邪大祝上法
長史書

北帝殺鬼之法先叩齒三十六下乃祝曰
天蓬天蓬九元殺重五丁都司高刀壯公七
正八靈太上浩克長願巨獸手把帝鍾素臬
三神嚴駕蒼龍威劍神王斬邪滅蹤紫氣乘
天丹霞赫衝吞慶食鬼橫身飲風吞舌綠齒

四目老翁天丁力士威南禦山天驕激戾威
北衝鋒三十萬兵衛我九重辟尸千里又却
不祥敢有小鬼欲來見狀攫天大斧斬鬼五
刑尖帝裂血北帝然骨四明破骸天飲滅類
神刀一下萬鬼自潰三十六句四言報一啄
齒以為第凡三十六句則三十六啄齒若冥
夜白日得祝為信也此無正時節禁事有問
及晚夜之際諸敬聞之處便可祝之中皆當
微言鬼有三被此祝者眼睛盲爛而身死矣
此謂諸殺鬼邪鬼及天地間自有召強鬼單
聞此而死耳非人死之鬼矣為鬼者也如此
鬼眼亦是有暗故盲爛則便死此上神祝皆
斬鬼之司名祝中有魯都中官位及諸神名
字故是聞而怖死也許其領威尚兵千人即
此御凶者也矣帝即大帝四明即諸公矣壯

帝祕其道北帝應建鬼殺人而值此祀便不可使傳故祕其法若世人得此祀恒能行之便不死之道也人之死也皆為諸鬼所殺耳今既不可取便為不使死也男女大小皆可行之但愚其不知此祀耳智者察用則無限

於大小此語以是今昔長史家因病行此立愈思既奔走病宜不除叩齒當臨目存神五藏五藏具五神自然存在謂切叩齒三十六時應臨目內視存具五藏以次想之皆令分明五藏之神備在於內然後可得兼正以御邪神以誅鬼耳盡都中秘此祝今密念之耳不可泄非有道者宜共祕之乎此非高貴之至典而是殺鬼之上術也惡氣備則正氣可接且以誅邪過試學者之要法而諸人多輕其淺少每致傳泄使神祝不驗呵執不行殊為可貴之也

楊君祿書兩本

卧枕緣

道基經曰枕高肝縮枕下肺塞以四寸為平枕席令煖其息乃長道林品及觀門經曰行

氣枕高二寸半大清經曰下神枕法曰五月五日若七月七日取山林之栢為枕長一尺二寸高四寸空中容一斗二升此則廣三寸五分栢心赤為蓋厚四分善致下之鑽蓋上為三行四十九孔凡百二十孔凡容一桑果

乃取藥內中用芎藭當歸白芷新夷杜衡山薊藜朮木蘭肉桂容栢實薤苳薤蕪欬冬花白術秦椒蜀椒桂乾薑飛廉防風人參桔梗白薇荆實凡二十四物以應二十四氣又加八毒藥以應八風烏頭附子梨蘆皂莢同草

礬石半夏華陰細辛都合三十二物皆咬咀以毒藥居香藥下按次滿枕中為布囊以衣枕之百日筋骨勁強面有光澤一年身盡香

四年白髮黑落齒生常別作一幃囊卧輒起盛覆之勿令氣泄年年易新藥合三十二種藥得一斗二升者一種轉取屑三合七圭八撮五分撮之四也且藥體有虛實又應作繩兩率取之今按大散家品藥云木十兩六銖得一升四合乾薑三兩二十二銖得五合桂三兩十四銖得五合防風二兩四銖得四合

桔梗二兩九銖得四合人參一兩二十銖得三合黃芩十七銖得一合細辛一兩二十一銖得三合附子十九銖得一合茯苓十八銖得一合礬石一兩六銖得一合牡蠣十六銖得一合此並諸藥之舊率今應分等枕藥先各各依准量戒之

旬中白虎者以所克本旬者甲子旬在辰甲戌旬在卯甲申旬在午甲午旬在子甲辰旬在寅甲寅旬在酉也入山辟虎者在定訣也要修科儀戒律鈔卷之十四